

MEWN PARTNERIAETH



Gaeaf 2017

Ychwanegu Gwerth drwy Bartneriaeth

Cefnogi dyfodol GIG
Cymru yn SkillsCymru

Staff y Bartneriaeth yn
dysgu sgiliau newydd yng
nghynhadledd y Rhwydwaith
Cynorthwyr Personol

Yr Adran Anafiadau Personol
yn arbed dros 1.5 miliwn
mewn 6 mis

Y Bartneriaeth Cydwasanaethau
yn cefnogi cynllun cenedlaethol
arloesol i recriwtio fferyllwyr



Cyfarwyddwr Gwasanaethau Caffael

Mark Roscrow yn derbyn
MBE am ei wasanaethau i fyd
caffael ym maes gofal iechyd
cyhoeddus yng Nghymru.



Cyflwyno Cynllun Cynorthwyo Gwaed Heintiedig Cymru



Y nod yw cynnig cymorth i bobl
sydd wedi eu heintio â Hepatitis
C a/neu HIV.



GIG
CYMRU
NHS
WALES

Partneriaeth
Cydwasanaethau
Shared Services
Partnership

CYNNWYS



- 04** Cefnogi dyfodol GIG Cymru yn SkillsCymru
- 06** Staff y Bartneriaeth Cydwasanaethau yn dysgu sgiliau newydd yng nghynhadledd Rhwydwaith Cynorthwyr Personol GIG Cymru
- 07** Cyflwyno Cynllun Cynorthwyo Gwaed Heintiedig Cymru
- 08** Y Labordy Profi Dyfeisiau Llawfeddygol yn cadw achrediad Gwasanaeth Achredu'r Deyrnas Unedig
- 09** Cyfarwyddwr Caffael yn derbyn MBE
- 10** Cynnal Wythnos Iechyd a Lles yn Nhŷ Matrix
- 12** Y newyddion diweddaraf gan y Gwasanaeth Atal Twyll
- 13** Mam a fwynhaodd wyliau yn America yn cael ei charcharu ar ôl ymgyrch ar y cyd gan y Gwasanaeth Atal Twyll
- 14** Yr Adran Anafiadau Personol yn arbed dros 1.5 miliwn mewn 6 mis
- 16** Llwyddiant i Wasanaethau Caffael yng ngwobrau uchel eu bri Cyfleoedd y Llywodraeth.
- 17** Llwyddiant i gyfreithiwr o Wasanaethau Cyfreithiol a Risg yn y *Law Society Excellence Awards*
- 18** Ambiwylans Awyr Cymru yn ymweld â Thŷ Matrix
- 19** Y Bartneriaeth Cydwasanaethau yn cefnogi cynhadledd i reolwyr practisiau meddygon teulu
- 20** Y Bartneriaeth Cydwasanaethau yn cefnogi cynllun cenedlaethol arloesol i recriwtio fferyllwyr
- 21** Y newyddion diweddaraf am waith elusennol y staff

CROESO

i 'Mewn Partneriaeth', y Cylchgrawn ar gyfer Ein Staff, y Byrddau Iechyd a'r Ymddiriedolaethau

Nod y cyhoeddiad hwn yw taflu goleuni ar sut y mae Partneriaeth Cydwasaethau GIG Cymru wedi cyflawni dros y Byrddau Iechyd ac Ymddiriedolaethau ledled Cymru yn ddiweddar.

Yn rhifyn y gaeaf hwn, byddwn ni'n canolbwyntio ar sut yr ydym ni'n gweithio gyda GIG Cymru ac yn ei gefnogi, gan ddangos sut y mae staff y Partneriaeth Cydwasaethau yn ymestyn eu hymrwymiad i gefnogi eraill yn y gweithle a'r tu hwnt iddo.

Mae hyrwyddo a chefnogi arloesedd yn un o bedwar nod creiddiol y Partneriaeth Cydwasaethau, felly mae'n werth nodi ein bod wedi bod yn rhan annatod o Gynllun Cenedlaethol newydd i Recriwtio Fferyllwyr Cyn Cofrestru, sef y cynllun cyntaf o'i fath yng Nghymru. O dan y cynllun newydd, mae myfyrwyr Fferylliaeth bellach yn rhan o system recriwtio sy'n seiliedig ar dystiolaeth. Mae'r system hon yn hwyluso'r gwaith o ddewis yr ymgeiswyr gorau am swyddi hyfforddiant mewn modd teg, tryloyw ac effeithlon. Mae adborth cychwynnol wedi bod yn gadarnhaol iawn, ac mae tystiolaeth gynnar y gall Cynllun Recriwtio Cenedlaethol canolog leiha'u faint o amser y mae gofyn i fferyllwyr fod i ffwrdd o'u gwaith arferol.

Gyda hynny mewn golwg, byddwn ni'n edrych ar sut y mae'r Partneriaeth Cydwasaethau wedi cefnogi dyfodol GIG Cymru yn nigwyddiadau SkillsCymru. Nod SkillsCymru yw ysbrydoli ac ysgogi'r bobl hynny sydd wrthi'n ystyried eu gyrfa yn y dyfodol trwy gynnig gweithgareddau ymarferol, a hynny â chymorth cydweithwyr o'r Byrddau Iechyd a'r Ymddiriedolaethau.

Wrth adlewyrchu ar weithio mewn partneriaeth, rwy'n falch iawn o gyhoeddi bod y Partneriaeth Cydwasaethau bellach yn lletya Cynllun Cynorthwyo Gwaed Heintiedig Cymru ar ran Llywodraeth Cymru. Nod y Cynllun hwn yw darparu cymorth i bobl a gafodd eu heintio â Hepatitis C a/neu HIV yn dilyn triniaeth â gwaed, cynhyrchion gwaed neu feinwe gan y GIG yn y 1980au a'r 1990au. Mae'r Cynllun am adeiladu ar y berthynas waith ragorol sydd ganddo â Chanolfan Cancer Felindre a'r Adran Gwaith a Phensiynau eisoes, er mwyn sicrhau bod dealltwriaeth o amgylchiadau buddiolwyr a bod y buddiolwyr hyn yn derbyn gwasanaeth sensitif ac urddasol.

Mae'r rhifyn hwn o Mewn Partneriaeth hefyd yn manylu ar arloesedd y Gwasanaeth Atal Twyll a sut y mae wedi gweithio mewn partneriaeth. Llwyddodd y Gwasanaeth Atal Twyll, ynghyd â'r Adran Gwaith a Phensiynau a Chyllid a Thollau EM, i gael erlyniad nodedig yn ddiweddar. Bu sôn mawr am yr erlyniad hwnnw a chafodd lawer o ganmoliaeth gan ein rhanddeiliaid a phartneriaid ledled GIG Cymru a thu hwnt.



Mae hefyd yn braf cael nodi bod y Labordy Profi Dyfeisiau Llawfeddygol wedi cadw ei achrediad gan Wasanaeth Achredu'r Deyrnas Unedig yn dilyn arolygiad deuddydd yn eu labordy yn Ysbyty Tywysoges Cymru, Pen-y-bont ar Ogwr. Mae hyn yn ganlyniad gwych ac unwaith eto mae'n cadarnhau'n huchelgais ni i fod yn wasanaeth o'r radd flaenaf.

Yn olaf, i gydnabod pwysigrwydd lles staff, mae'r Partneriaeth Cydwasaethau yn cymryd camau i hyrwyddo iechyd a lles ymhlith ein staff er mwyn cynnal gweithlu sy'n iach a chadarn. Cafodd y digwyddiad Iechyd a Lles cyntaf ei gynnal yn Nhŷ Matrix, Abertawe, â'r nod o annog staff i gymryd rhan mewn nifer o weithgareddau i feithrin arferion iach yn eu bywydau bob dydd ac i gadw'r arferion iach hyn yn y gweithle. Mae adborth cychwynnol wedi bod yn gadarnhaol iawn a bydd gweithgareddau tebyg dros y flwyddyn i ddod ymhob un o'n canolfannau rhanbarthol.

Hoffwn i orffen drwy ddymuno Nadolig Llawen ichi a iechyd, cyfoeth a hapusrwydd i bawb yn 2018.

Neil Frow
Rheolwr Gyfarwyddwr



@NWSSP



NWSSP



Cefnogi Dyfodol

GIG

Cymru **Skills**Cymru



Sharon Evans (yn y canol) gyda chydweithwyr o GIG Cymru, a enillodd y wobwr ar gyfer y 'Stondin Fwyaf Rhyngweithiol' yn y digwyddiad yn Llandudno.

Ym mis Hydref 2017 dychwelodd **SkillsCymru**, sef y digwyddiad gyrfaedd a sgiliau i Gymru

Am y bedwaredd flwyddyn yn olynol, trefnodd Gwasanaethau'r Gweithlu, Addysg a Datblygu o'r Bartneriaeth Cydwasaethau stondin GIG Cymru yn y digwyddiadau yn Llandudno a Chaerdydd.

Nod SkillsCymru, sy'n croesawu bron i 10,000 o fyfyrwyr yn y ddau ddigwyddiad, yw ysbrydoli ac ysgogi ymwelwyr sy'n ystyried eu gyrfa trwy gynnig gweithgareddau ymarferol.

Â chymorth gan gydweithwyr yn y Byrddau Iechyd ac Ymddiriedolaethau, Fforwm Myfyrwyr Iechyd Cymru a Sefydliadau Addysg Uwch, dysgodd y rhai a ymwelodd â'r stondin am y 350 a mwy o yrfaoedd sydd ar gael yn y GIG trwy siarad ag arbenigwyr.

Cawsant y cyfle i fynd i mewn i ambiwlans, i 'deimlo' effeithiau heneiddio ac i ddysgu am sut i gymryd gwaed a darllen pelydrau-x hefyd.

Eleni, cafodd y 'theatr sgiliau' ei chyflwyno yn y digwyddiad yng Nghaerdydd. Sicrhodd GIG Cymru dri slot, lle cafodd sgiliau achub bywyd sylfaenol eu harddangos a chafodd ymwelwyr eu hannog i roi cynnig arnynt.

Gwnaeth ymagwedd ragweithiol, cefnogaeth a gwaith caled y tîm argraff ar yr ymwelwyr, ac enillodd y stondin yn y Gogledd wobwr am y 'Most Engaging Stand'.

Dywedodd Sharon Evans, Swyddog Gyrfaedd yng Ngwasanaethau'r Gweithlu, Addysg a Datblygu (GGAD) a helpodd i gydlynu'r ddau ddigwyddiad:

"Mae SkillsCymru yn gyfle gwerthfawr i bobl ifanc archwilio'r dewisiadau gyrfa sydd ar gael iddynt yn y GIG. Mae llawer o'r ymwelwyr yn rhagdybio mai dim ond swyddi meddygol a nyrsio sydd ar gael, felly mae'n ffordd wych o dynnu sylw at y cyfleoedd niferus sydd ar gael ac i'w hysbrydoli i fod yn rhan o'r genhedlaeth nesaf o weithwyr ac arweinwyr yn GIG Cymru."

Bydd SkillsCymru yn dychwelyd yn 2018. Os hoffech chi ragor o wybodaeth am sut y gallwch ch gymryd rhan, anfonwch e-bost at Sharon Evans:
sharon.evans25@wales.nhs.uk



Pobl yn rhoi cynnig ar siwt efelychu corff yr henoed yn stondin GIG Cymru



Myfyrwyr yn rhoi cynnig ar offer laparosgopig yn stondin GIG Cymru



Cydweithiwr o GGAD, Gail Harries-Huntley (ar y chwith), yn dangos i fyfyrwr sut i gymryd gwaed yn ddiogel



Fferylllydd a Technegydd Fferyllol yn trafod eu dyletswyddau â myfyrwyr



O'r chwith: Pretty James, Claire Sykes, Alison Hadley, Giyas Uddin, Amanda Jones, Heidi Desscan, Emma Jones, a Pam Fitzpatrick



Staff y Bartneriaeth Cydwasaethau yn dysgu sgiliau newydd yng nghynhadledd Rhwydwaith Cynorthwyr Personol GIG Cymru

Aeth nifer o gydweithwyr o'r Bartneriaeth Cydwasaethau i gynhadledd flynyddol Rhwydwaith Rhagoriaeth Cynorthwyr Personol GIG Cymru yn ddiweddar, a gafodd ei gynnal yng ngwesty Mercure Holland House yng Nghaerdydd.

Mae'r Rhwydwaith hwn yn cynnig cyfleoedd i ddatblygu a rhwydweithio ynghyd â chymorth i staff sy'n gweithio mewn rôl weinyddol neu fel Cynorthwyr Personol ac Ysgrifenyddion.

Y nod yw rhannu arfer da ymhlith Cynorthwyr Personol, Ysgrifenyddion a Gweinyddwyr, cynyddu achosion o gydweithio a manteisio ar y cyfleoedd i ddatblygu sydd ar gael yn GIG Cymru.

Hwn oedd degfed pen-blwydd y Rhwydwaith sy'n cael ei ariannu'n rhannol gan y Bartneriaeth Cydwasaethau. Roedd amrywiaeth o siaradwyr yn y gynhadledd, gan gynnwys:

- Adam Fidler, o'r *Adam Fidler Academy*;
- Lisa Miller, Rheolwr Cyffredinol/Dirprwy Gyfarwyddwr Gwasanaethau Cancer Canolfan Ganser Felindre;



O'r chwith: Karen Coombes, Lisa Price, Gareth Price, Rozalyn Hughes, Eleanor Wales ac Andrea Walbeoff

- Cyflwynydd radio lleol, siaradwr a DJ, Lee Jukes;
- Cyfarwyddwr *Your Excellency* Cyf. a chyn Gynorthwydd Personol, Lindsay Taylor.

Dywedodd Pretty James, o Wasanaethau Cyfreithiol a Risg:

"Roedd y digwyddiad yn wych ac wedi ei drefnu'n dda, gyda siaradwyr ysbrydoledig. Roedd y digwyddiad wedi'n calonogi a'n hysbrydoli. Dysgon ni sut y gallwn ni fod yn effeithiol trwy gredu ynddon ni ein hunain a bod ag ymagwedd gadarnhaol, a thrwy osod ffiniau a gwthio'n ôl mewn modd diplomyddol a phriodol".



Cyflwyno Cynllun Cynorthwyo Gwaed Heintiedig Cymru

Mae Cynllun Cynorthwyo Gwaed Heintiedig Cymru yn wasanaeth newydd a letyir gan y Bartneriaeth Cydwasaethau ar ran Llywodraeth Cymru.

Nod y Cynllun, a gafodd ei sefydlu ym mis Hydref 2017, yw cynorthwyo pobl sydd wedi eu heintio â Hepatitis C a/neu HIV yn dilyn triniaeth â gwaed, cynhyrchion gwaed neu feinwe gan y GIG yn y 1980au a 1990au.

Mae tîm y cynllun yn gweithio yn Nhŷ'r Cwmnïau yng Nghaerdydd, dan arweiniad Rheolwr y Gwasanaeth, Mary Swiffen-Walker.

Gan gymryd yr awenau oddi wrth gynlluniau eraill yn y DU (sef Ymddiriedolaeth Eileen, Ymddiriedolaeth Macfarlane, MFET Cyf., Cronfa Skipton a Sefydliad Caxton), mae'r cynllun yn darparu'r gwasanaethau canlynol:

- Gwasanaeth cymorth pwrpasol dan arweiniad Cynghorwyr Hawliau Lles profiadol.
- Proses dalu sy'n ddibynadwy, ymatebol a chywir
- Gwefan bwrpasol a fydd yn cynnwys gwybodaeth a chngor defnyddiol
- Adeiladu ar y berthynas waith ragorol sydd gennym eisoes â Chanolfan Ganser Felindre a'r Adran Gwaith a Phensiynau, er mwyn sicrhau bod dealltwriaeth ynghylch amgylchiadau buddiolwyr a bod y buddiolwyr hyn yn derbyn gwasanaeth sensitif ac urddasol.



Tîm y Cynllun

Y rhes gefn o'r chwith: Ryan Clappe, Sarah Ferrier, Rebecca O'Callaghan a Rishi Rai

Y rhes flaen: Mary Swiffen-Walker a Martin Riley

- Helpu pobl i ddeall a defnyddio'r system gofal iechyd trwy weithredu fel eu gweithiwr allweddol
- Gwasanaeth di-dor â phwynt cyswllt sengl
- Datblygu mesurau adrodd sy'n seiliedig ar ganlyniadau
- Ennill Achrediad Ansawdd ar gyfer y Gwasanaeth Cymorth
- Proses Apelio Annibynnol

Mae cysylltiadau agos hefyd â sawl rhanddeiliad a sefydliad allanol, sy'n sicrhau bod rhwydweithiau partneriaeth cryf yn eu lle ar gyfer atgyfeiriadau a chngor ynghyd â chynrychiolaeth deg o sawl sector.

Rhagor o wybodaeth

Gwefan:

Wibss.wales.nhs.uk

Ffôn:

02920 902280

E-bost:

wibss@wales.nhs.uk

Cynllun Cynorthwyo Gwaed Heintiedig Cymru
4ydd llawr
Tŷ'r Cwmnïau
Crown Way
Caerdydd
CF14 3UB



Cynllun Cynorthwyo Gwaed Heintiedig Cymru
Wales Infected Blood Support Scheme

Y Labordy Profi Dyfeisiau Llawfeddygol yn cadw ei achrediad gan UKAS

Mae'r Labordy Profi Dyfeisiau Llawfeddygol wedi llwyddo i gadw ei achrediad gan Wasanaeth Achredu'r Deyrnas Unedig yn ddiweddar, ar ôl arolygiad deuddydd yn eu labordy yn Ysbyty Tywysoges Cymru, Pen-y-bont ar Ogwr.

Gwasanaeth Achredu'r Deyrnas Unedig yw unig gorff achredu'r Deyrnas Unedig. Mae'r Gwasanaeth, sydd wedi ei gydnabod gan y Llywodraeth, yn asesu sefydliadau sy'n darparu gwasanaethau ardystio, profi, arolygu a chalibradu ar sail safonau y cytunwyd arnynt yn rhyngwladol.

Mae ennill achrediad gan y Gwasanaeth hwn yn dangos bod y gwerthuswyr â'r gallu i wneud eu gwaith a'u bod yn ddiuedd. Yn fyr, mae Gwasanaeth Achredu'r Deyrnas Unedig yn 'gwirio' y rhai sy'n 'gwirio'.

Roedd Peter Phillips, Cyfarwyddwr y Labordy Profi Dyfeisiau Llawfeddygol, wrth ei fodd â'r canlyniad, a dywedodd:

"Aeth yr arolygiad rhagddo'n dda iawn gyda chanlyniad llwyddiannus. Roedd yr arolygwyr i'w gweld yn fodlon ar sut y mae'r labordy yn gweithio, a dywedon nhw eu bod yn hapus â'r hyn a welon nhw."

Argymhellwyd ein bod yn cadw ein hachrediad, ar yr amod ein bod yn delio ag unrhyw "close-out actions" yn briodol. Rydym ni wedi ymrwymo i ddelio â phob gweithred yn erbyn diwedd mis Hydref 2017".

Gwybodaeth Bwysig

Y Labordy Profi Dyfeisiau Llawfeddygol, Ysbyty Tywysoges Cymru, Pen-y-bont ar Ogwr

Ffôn: 01656 752820

E-bost: info@smtl.co.uk

Gwe: www.smtl.co.uk




Beth yw'r Labordy Profi Dyfeisiau Llawfeddygol?

Prif waith y Labordy yw darparu gwasanaethau profi a gwasanaethau technegol i GIG Cymru mewn perthynas â dyfeisiau meddygol, gan alluogi gwasanaethau caffael yn GIG Cymru ac eraill i gaffael ar sail tystiolaeth. Mae'r Labordy hefyd yn darparu gwasanaethau masnachol i'r diwydiant dyfeisiau meddygol rhyngwladol, sy'n defnyddio adroddiadau'r Labordy i dendro am fusnes newydd, cyflwyno i gyrff hysbysedig a datblygu dyfeisiau a thechnolegau newydd.

Roedd y Labordy hefyd yn rhan o dîm (Lymffoedema Cymru gyda Gwasanaethau Caffael y Bartneriaeth Cydwasaethau) a enillodd wobwr yng nghategori 'Procurement Patient Safety' yng Ngwobrau Diogelwch Cleifion 2016. Dros y 30 mlynedd diwethaf mae'r labordy wedi meithrin enw da yn rhyngwladol ym maes profi dyfeisiau meddygol, ac mae'n neilltuo o weithgar yn datblygu safonau ar gyfer y Sefydliad Safonau Prydeinig a'r Sefydliad Rhyngwladol dros Safoni.

SURGICAL MATERIALS TESTING LABORATORY



Dyfarnu MBE i Gyfarwyddwr Gwasanaethau Caffael

Longyfarchiadau i Gyfarwyddwr Gwasanaethau Caffael, Mark Roscrow, sydd wedi derbyn MBE mewn seremoni ym Mhalas Buckingham yn Llundain.

Dyfarnwyd y MBE i Mark yn sgil ei wasanaethau i gaffael ym maes gofal iechyd yng Nghymru.

Mae Mark wedi cael gyrfa gyfoethog ac amrywiol. Ymunodd â'r Gwasanaeth Iechyd ym 1978 a gweithiodd i Adran Cyflenwadau Awdurdod Iechyd Morgannwg Ganol, cyn symud ymlaen wedyn i'r WHTSO (a adnabyddid yn hwyrach fel Awdurdod Gwasanaethau Iechyd Cyffredin Cymru).

Ym 1996, penodwyd Mark yn Gyfarwyddwr Cyflenwadau Iechyd Cymru (CIC), ar ôl prawf marchnad y Gwasanaethau Contractio a'r Gadwyn Gyflenwi, a daeth yn Gyfarwyddwr Gwasanaethau Caffael Partneriaeth Cydwasaethau Cymru yn 2011 pan gafodd ei ffurfio.

Roedd datblygu proses tendro ar y we a lansio gwefan ar gyfer caffael hefyd yn gyflawniadau nodedig, dau beth sy'n gyffredin iawn erbyn hyn.

Ar ôl derbyn ei MBE, dywedodd Mark:

"Hoffwn i ddiolch i bawb sydd wedi anfon negeseuon ataf i yn dilyn derbyn fy ngwobr. Rydw i wrth fy modd yn derbyn hyn, yn enwedig o ystyried ei bod yn cydnabod Caffael felly imi mae'n adlewyrchu'r gwaith rydym ni oll yn ei wneud fel tîm."



Mark gyda'i MBE



Mark gyda'i MBE...a'i warchodwyr!



Cynnal Wythnos Iechyd a Lles yn Nhŷ Matrix

I ddathlu symud o Ganolfan Oldway i Dŷ Matrix, cynhalion ni ein hwythnos Iechyd a Lles gyntaf, lle hyrwyddon ni les staff a phwysigrwydd byw'n iach.

Nod yr wythnos oedd annog y staff i gymryd rhan mewn gweithgareddau i feithrin arferion iach newydd ac i gadw'r arferion hyn yn y gweithle, â chymorth gan gydweithwyr.

Roedd yr wythnos yn llawn dop o weithgareddau a chan fod cynifer ohonynt wedi bod yn boblogaidd, megis y Grŵp Cerdded o amgylch y Llyn, ioga a Bocs Ffrwythau Elusennol y Staff, byddant yn aros!

Dywedodd yr athro ioga Simon Hegarty:

"Diwrnod gwych o ioga gyda Roxann Davies yn nhŷ Matrix, yn rhan o Wythnos Iechyd a Lles y Bartneriaeth Cydwasanaethau.

Ces i groeso cynnes gan bawb ac roedd cynifer o bobl yn barod i gymryd rhan yn y sesiynau ioga...byddai mwy o amser wedi bod yn wych!


Roedd yn wych gweld ein gwasanaeth iechyd yma yng Nghymru yn cymryd yr awenau ac yn arwain ar y math hwn o ofal cynaliadwy am bobl yn y gweithle. A'i roi'n syml, os dydych chi ddim yn edrych ar ôl eich staff, dych chi ar ei hôl hi".



Cydweithwyr o'r Bartneriaeth Cydwasanaethau a Iechyd Cyhoeddus Cymru yn paratoi ar gyfer eu sesiwn cerdded o gwmpas y llyn.



O'r chwith: Alison Davies a Mel Davies yn Stondin Cynllun Cymru Iach ar Waith





Ein dysgwyr Cymraeg yn Nhŷ Matrix

Gwahoddon ni ein cydweithwyr o Iechyd Cyhoeddus i ymuno yn y dathliadau o fyw'n iach hefyd, ac roeddent yn ddigon caredig i fenthylg propiau inni o gynllun Cymru Iach ar Waith. Roedd y propiau hyn yn cynnwys 'Life and Death Lungs', 'Beer Goggles' a modelau o un pwys a phum pwys o fraster corff.

Cefnogodd Sustrans Cymru y digwyddiad hefyd, trwy fod mor garedig â darparu mapiau o lwybrau cerdded a seiclo yn ardal Abertawe a gafodd eu harddangos ar stondin Teithio Llesol.

Cafodd dosbarthiadau Cymraeg eu cynnal i staff hefyd, lle dysgon nhw am ffoneg, y wyddor ac ateb y ffôn. Roedd y staff hefyd wedi chwarae gêm o Nadredd ac Ysgolion â thema Gymraeg, i'w helpu i ddeall rhai geiriau, rhifau ac ymadroddion.

Daeth yr wythnos i ben gydag ambell i deisen i ddathlu ym More Coffi Mawr Macmillan, ac yn ôl y sôn roedd y smwddi llysieuol, a oedd i fod yn gosb, wedi taro tant hyd yn oed!



Sesiwn ioga ar y gweill!




Dysgwyr Cymraeg yn chwarae Nadroedd ac Ysgolion

Cysylltwch â Roxann Davies os oes diddordeb gennych chi mewn helpu ar ein taith Iechyd a Lles.

roxann.davies@wales.nhs.uk

Newyddion diweddaraf o'r Gwasanaeth Atal Twyll

TWYLL



Twyll Ceisiadau Swydd

Cafodd Zara Ahmed, myfyrwraig a gyflwynodd dros 30 o geisiadau swydd i'r GIG oedd yn cynnwys gwybodaeth ffug, ei dedfrydu yn ddiweddar yn Llys yr Ynadon Caerdydd, yn dilyn ymchwiliad dan arweiniad Tîm Atal Twyll y GIG ym Mwrdd Iechyd Caerdydd a'r Fro.

Rhwng Ebrill a Hydref 2016, cyflwynodd Ahmed dros 30 o geisiadau swydd gwahanol trwy wefan NHS Jobs. Daeth i'r amlwg bod Ahmed wedi dweud celwyddau am ei phrofiad gwaith a'i chymwysterau ar bob un o'i cheisiadau. Honnodd Ahmed ei bod wedi treulio blwyddyn ar raglen arsylwi yn Ysbyty Athrofaol Cymru yng Nghaerdydd a bod ganddi Safonau Uwch mewn Mathemateg a Chemeg, ynghyd â honni iddi ennill graddau uwch nag y gwnaeth mewn gwirionedd mewn Busnes, y Gyfraith a Bioleg.

Plediodd Ahmed yn euog i un cyhuddiad o Dwyll trwy Ddweud Anwireddau a chafodd Orchymyn Cymunedol o 12 mis lle bydd rhaid iddi weithio am 120 awr heb dâl. Cafodd Ahmed orchymyn i dalu am gostau'r ymchwiliad hefyd.

Twyll Taliadau Gofal Plant

Cafodd Nicola Parkinson, myfyrwraig nysio a gyflwynodd gais am gostau gofal plant i'r GIG oedd yn cynnwys gwybodaeth ffug, ei dedfrydu yn ddiweddar yn Llys yr Ynadon Llandudno, yn dilyn ymchwiliad dan arweiniad Tîm Atal Twyll y GIG.

Gall myfyrwyr y GIG sy'n derbyn bwrsariaeth fod â hawl i wneid cais am gymorth ariannol tuag at eu costau gofal plant. Dim ond os mai darparwr gofal plant cofrestredig sy'n gofalu am y plentyn y gellir gwneud hyn. Bob tymor, mae rhaid i'r darparwr gofal plant nodi'r costau gwirioneddol ar ffurflen a gaiff ei chyflwyno i Uned Dyfarniadau Myfyrwyr y Bartneriaeth Cydwasanaethau. Derbyniodd Uned Dyfarniadau Myfyrwyr y GIG ffurflen gofal plant oddi wrth Parkinson ym Medi 2015, ac roedd yn ymddangos ei bod wedi newid y costau gofal plant arni. Yn dilyn hyn cysylltodd y Tîm Dyfarniadau â'r Tîm Atal Twyll.

Daeth i'r amlwg yn dilyn ymholiadau y cafodd y newidiadau eu gwneud ar ôl i'r darparwr gofal plant gwblhau'r ffurflen. Yn y llys, plediodd Parkinson yn euog i un cyhuddiad o Dwyll Trwy Ddweud Anwireddau a chafodd ddirwy o £200. Cafodd Parkinson ei gorchymyn i dalu iawndal a chostau i'r GIG hefyd.



STOPIWCH!

Atal Twyll

Mam a fwynhaodd wyliau yn America yn cael carchar ar ôl ymgyrch ar y cyd dan arweiniad y Gwasanaeth Atal Twyll

Roedd myfyrwraig nysio a hawliodd fwy na £70,000 mewn credydau treth trwy dwyll yn byw bywyd "moethus", roedd yn mwynhau gwyliau gyda'i gŵr, cafodd lawdriniaeth blastig a chymerodd gydfenthyciad ar gyfer eiddo rhannu amser yn America.

Clywodd Llys y Goron Merthyr Tudful fod Tammy Ann Gunter wedi hawlio credydau treth ar ôl honni ei bod yn berson sengl, ei bod wedi gwneud ceisiadau ffug am gyllid i fyfyrwyr a bwrsariaeth gan y GIG a'i bod wedi ffugio llythyr o Gyllid a Thollau Ei Mawrhydi.

Dechreuodd yr ymchwiliad ar y cyd yn Ionawr 2015, dan arweiniad Gwasanaeth Atal Twyll GIG Cymru, gyda'r Adran Gwaith a Phensiynau a Chyllid a Thollau EM hefyd cymryd rhan ynddo.

Cafodd Ms Gunter ei charcharu am ddwy flynedd yn y llys ar ôl pledio'n euog i un cyhuddiad o ymwneud â gweithgarwch twyllodrus â'r nod o dderbyn credydau treth, un cyhuddiad o ffugio a phedwar cyhuddiad o dwyll. Gorchymynnwyd i un cyhuddiad o dwyll aros ar ei ffeil.

Cafodd ei gŵr Neil Mark Hart ddedfryd o chwe mis yn y carchar ar ôl pledio'n euog i un cyhuddiad o annog neu gynorthwyo trosedd, gan gredu y câi ei chyflawni.



Tammy Ann Gunter yn cyrraedd Llys y Goron Merthyr Tudful

Clywodd y llys fod gan Ms Gunter fywyd moethus, ei bod wedi cael llawdriniaeth blastig yn nwyrain Ewrop a'i bod hi a'i gŵr, o Central Avenue, Cefn Fforest ger y Coed Duon a briododd ym Mehefin 2009, wedi mwynhau gwyliau yn Las Vegas yn 2011 a Florida yn 2013 a'u bod wedi cymryd cydfenthyciad o \$30,000 ar gyfer eiddo rhannu amser yn America.

Ym mis Medi 2009, gwnaeth Gunter gais i Gyllid Myfyrwyr Cymru mewn perthynas â gradd dair blynedd mewn troseddeg a'r gyfraith ym Mhrifysgol Morgannwg fel yr oedd ar y pryd. Nododd Ms Gunter ar ei ffurflen gais ei bod yn sengl.

Pan ofynnodd Cyllid Myfyrwyr Cymru am wybodaeth am ei statws priodasol, nid oedd Ms Gunter wedi darparu'r wybodaeth felly cafodd ei chais ei wrthod. Derbyniodd hi £21,396 wrth astudio ar gyfer y radd mewn troseddeg, ond clywodd y llys fod ganddi hawl i'r arian hwnnw.

Disgwylir i wrandawriad gael ei gynnal ar Chwefror 28 y flwyddyn nesaf mewn perthynas â chais o dan Ddeddf Enillion Troseddau 2002. Wrth ddedfrydu, dywedodd y Barnwr Peter Heywood:

"Cafodd y twyll ei gyflawni dros gyfnod maith. Roedd rhywfaint o soffistigeiddrwydd a chynllunio yn rhan ohono".

Dywedodd Craig Greenstock, prif arbenigwr atal twyll y Bartneriaeth Cydwasanaethau:

"Mae Tammy Ann Gunter, â chymorth Neil Mark Hart, wedi bod yn benderfynol a chraff wrth geisio cael cymaint o arian â phosibl gan y cyrff cyhoeddus unigol.

Rydym ni'n gobeithio, felly, y bydd y ddedfryd heddiw yn dangos na chaiff twyll bwriadol ei oddef ac y bydd y GIG, ynghyd â chyrrff cyhoeddus eraill, yn cymryd camau pendant yn erbyn y lleiafrif anonest sydd, mewn gwirionedd, yn dwyn arian y trethdalwyr er eu budd eu hunain".

Ydych chi'n pryderu am dwyll yn y GIG?

Rydym ni'n delio ag ef

Os oes unrhyw amheuan neu bryderon gennych chi, ffoniwch ni yn ddi-enw

0800 028 40 60

Neu chwiliwch 'NHS Fraud' ar lein am ragor o wybodaeth



Yr Adran Anafiadau Personol yn arbed dros £1.5 mewn 6 mis



Mae'r Adran Anafiadau Personol yn rhan o Wasanaethau Cyfreithiol a Risg y Bartneriaeth Cydwasaethau. Dan arweiniad yr Uwch Gyfreithiwr Andrew Hynes, mae'r tîm yn rhoi cyngor i'r Ymddiriedolaethau a'r Byrddau Iechyd ledled Cymru am y materion canlynol:

- Cyflogwyr ac atebolrwydd cyhoeddus
- Straen oherwydd gwaith
- Bwlio ac aflonyddu
- Trais ac ymddygiad ymosodol
- Afiechydon diwydiannol, gan gynnwys asbestos a cholli clyw
- Symud gwrthrychau a phobl â llaw
- Anaf straen ailadroddus
- Offer diffygiol
- Rheoli heintiau
- Achosion o lithro a baglu


Dros gyfnod o chwe mis - o 1 Ebrill 2017 i 30 Medi 2017, mae'r Adran Anafiadau Personol wedi cael ambell ganlyniad rhagorol o ran arbed arian i GIG Cymru.

Dyma ychydig o achosion o wahanol Fyrdau Iechyd yng Nghymru sydd wedi eu hamddiffyn yn llwyddiannus gan y Tîm Anafiadau Personol:

Roedd yr hawliwr yn defnyddio ffrâm gerdded fel y gall fynd i'r tŷ bach Honnodd yr hawliwr fod y ffrâm wedi llithro mewn dŵr sebonllyd ar y llawr, a ddaeth o fwced yr oedd wedi ei adael o dan wely claf arall.

Gwrthododd y Bwrdd Iechyd atebolrwydd ar y sail bod yr hawliwr wedi drysu a'i bod wedi bod yn gweld rhithweledigaethau ar y ward, ac felly mae'n debygol nad oedd yn gywir am bresenoldeb dŵr sebonllyd. Nid oedd unrhyw dystion ac roedd cofnodion y claf yn cynnwys sawl cofnod a wnaed ar y pryd oedd yn awgrymu ei bod wedi cwmpo oherwydd i'w choesau wanhau o dani.

Cafodd yr hawliad ei dynnu'n ôl gan yr hawliwr.



Arbedion:
£33,000

Cerddodd yr hawliwr i mewn i ystafell newid y nyrsys a llithrodd yn sydyn oll a chwmpo.

Gwrthododd y Bwrdd Iechyd atebolrwydd ar y sail bod yr hawliwr, a enwodd dyst nad oedd yno yn ôl gwybodaeth a ddaeth i'r fei yn ddiweddarach, yn aelod profiadol o staff domestig a byddai wedi gwybod p'un a oedd y llawr yn cael ei lanhau ai peidio. Mae'r dull glanhau sy'n cael ei ddefnyddio hefyd yn gadael y llawr yn sych grimp.

Nododd yr hawliwr nad oedd wedi gweld dim ar y llawr y gallai fod wedi baglu drosto.

Tynnodd yr hawliwr ei hawliad yn ôl.



Arbedion:
£34,000

Honnodd yr hawliwr y gofynnwyd iddo symud nifer o oergelloedd ar draws iard. Anafodd ei hun tra oedd yn symud un o'r oergelloedd heb gymorth.

Gwrthododd y Bwrdd Iechyd atebolrwydd oherwydd bod ymchwiliadau a wnaed ar ôl y digwyddiad wedi datgelu bod yr hawliwr wedi gwneud y dasg er gwaethaf cyfarwyddyd i beidio, ac oherwydd bod yr hawliwr wedi cadw ei hyfforddiant symud â llaw yn gyfredol.

Tynnodd yr hawliwr ei hawliad yn erbyn y Bwrdd Iechyd yn ôl.




Arbedion:
£11,500

Cyfanswm yr arbedion a wnaed gan yr Adran Anafiadau Personol o 1 Ebrill 2017 hyd at 30 Medi 2017:

£1,694,000

Roedd yr hawliwr yn symud cratiau o fara . Wrth iddo dynnu'r cratiau, dechreuon nhw gwmpo. Cododd yr hawliwr ei ddwylo i'w sadio ond cafodd ei anafu wrth wneud hynny. Cafodd yr hawliad ei setlo ag £20,444 mewn costau ac iawndal.

Cyflwynodd y Bwrdd Iechyd wrth-hawliad yn erbyn y cwmni bara a thrwy wneud hynny llwyddodd i adennill hanner o gostau'r hawliad.



Arbedion:
£10,422

Honnodd yr Hawliwr iddo lithro mewn dŵr yr oedd yn ei ôl ef yn gollwng o'r sinc yn ei ystafell ymolchi.

Cafodd atebolrwydd ei wrthod ar y sail bod yr hawliwr yn ymwybodol o'i anawster-au symud a'i fod wedi parhau i symud er gwaethaf cyngor i beidio.

Tynnodd yr hawliwr yr hawliad yn ôl.



Arbedion:
£10,380

Roedd yr hawliwr yn gweithio ar ward oedd yn brin o staff. Honnodd yr hawliwr fod angen un nyrs arall i wneud y gwaith symud â llaw, megis symud cleifion, symud gwelyau, codi cleifion a rholio cleifion.

Bythefnos ar ôl gwneud y tasgau hyn dechreuodd yr hawliwr ddioddef problemau gyda'i chefn. Cafodd yr hawliad ei wrthod ar y sail y byddai rhaid i'r hawliwr brofi bod pob tasg symud â llaw yn ystod y pythefnos hwnnw lle oedd prinder staff wedi bod yn esgeulus.

Nid oedd yr hawliwr yn gallu profi hyn felly cafodd yr hawliad ei dynnu'n ôl.



Arbedion:
£35,000

Roedd yr hawliwr yn cerdded i'w ddesg pan lithrodd ar lawr gwlyb. Trawodd ei ben wrth gwmpo ac aeth yn anymwybodol. Cafodd atebolrwydd ei wrthod ar y sail bod tystion sy'n cadarnhau bod arwyddion llawr gwlyb yn eu lle a bod yr hawliwr wedi cael gwybod am hynny ar adeg y digwyddiad.

Cafodd yr hawliad ei dynnu'n ôl.



Arbedion:
£10,000

Honnodd hawliwr fod claf yn adnabyddus am fod yn ymosodol a'i fod yn dioddef problemau iechyd yn sgil rhoi'r gorau i alcohol. Am 3 o'r gloch yn y bore, gofynnodd y claf i'r hawliwr a fyddai modd iddynt fynd am ddiod ac atebodd yr hawliwr drwy esbonio eu bod yn yr ysbyty.

Nid oedd y claf yn credu'r hawliwr ac nid oedd modd ei lonyddu. Gafaelodd y claf ym mhenelin chwith yr hawliwr â'i law chwith a thynnodd yr hawliwr dros y gwely.

Nid oedd fawr o dystiolaeth am ddisgrifiad yr hawliwr o'r hyn a ddigwyddodd, felly cafodd yr hawliwr ei berswadio i beidio â bwrw ymlaen â'r hawliad yn erbyn y Bwrdd Iechyd.



Arbedion:
£31,400

Roedd yr hawliwr yn gynorthwydd domestig a honnodd ei fod yn dioddef o Anaf Straen Ailadroddus a llid y tendonau o ganlyniad i'w ddyletswyddau.

Cafodd atebolrwydd ei wrthod oherwydd diffyg dystiolaeth i ategu'r hawliad. Penderfynodd yr hawliwr beidio â bwrw ymlaen â'r hawliad.



Arbedion:
£32,000

Llwyddiant i Wasanaethau Caffael yng ngwobrau uchel eu bri Cyfleoedd y Llywodraeth



Staff o Wasanaethau Caffael yn dathlu yng Ngwobrau Cyfleoedd y Llywodraeth 2017.



Nic Cowley (yr ail ar y chwith) a Jannine Crees (gyda'r wobwr), sef yr enillwyr nghanegori "Innovation / Initiative".



Richard Gaunt (yr ail ar y chwith) a Paul Sydenham (gyda'r ffrâm llun), a enillodd "Gymeradwyaeth Uchel" yng nghanegori "Arwain Ymarfer Caffael".



Sara Taylor (yr ail ar y chwith) ac Angela Fletcher (yn dal y wobwr), a enillodd wobwr "Tîm y Flwyddyn".

Cafodd staff Gwasanaethau Caffael eu hanrhydeddu ar y cyd yn ddiweddar yng ngwobrau uchel eu bri Cyfleoedd y Llywodraeth mewn seremoni yng Ngwesty Mecure Holland House yng Nghaerdydd ar 9 Tachwedd 2017.

Roedd y seremoni, y gwerthodd pob un o'i thocynnau ac a gafodd ei chyflwyno gan y cyflwynydd teledu Mei Davies, yn uchafbwynt cyffrous i Wyl Caffael Cymru a daeth bron i 300 o gynrychiolwyr o gymuned caffael cyhoeddus Cymru i gystadlu am wobwr 'Cyfleoedd y Llywodraeth' uchel ei bri.

Cafodd Gwasanaethau Caffael ddwy wobwr. Y Tîm Comisiynu a enillodd y wobwr gyntaf, sef "Arloesi / Blaengarwch – Iechyd, Gofal Cymdeithas ac Arall"

Enillodd y Tîm Comisiynu "Gymeradwyaeth Uchel" yng nghanegori "Arwain Ymarfer Caffael" hefyd. Tîm y Gadwyn Gyflenwi yn Storffeydd Pen-y-Bont ar Ogwr a enillodd yr ail wobwr, sef "Tîm y Flwyddyn".

Mae'r gwobrau yn adlewyrchu rhai o gyflawniadau rhagorol Gwasanaethau Caffael dros y flwyddyn ddiwethaf, sydd wedi arddangos cydweithio ac arloesi.

Y wefan am ragor o

wybodaeth:

<http://www.goawards.co.uk/wales/>

Llwyddiant i gyfreithiwr o Wasanaethau Cyfreithiol a Risg yn y Law Society Excellence Awards

Dyfarnwyd gwobr "Highly Commended" i Gymdeithas y Cyfreithwyr Cyflogaeth yn ddiweddar yng nghategori "Excellence in Pro Bono" yn y Law Society Excellence Awards 2017.

Daniela Mahapatra, uwch gyfreithiwr yn y Tîm Cyflogaeth yng Ngwasanaethau Cyfreithiol a Risg, sy'n cynrychioli Cymru yng Nghymdeithas y Cyfreithwyr Cyflogaeth. Cynrychiolodd Daniela y Gymdeithas, ynghyd â chydweithwyr o'i Phwyllgor Pro Bono, yn y Seremoni Wobrwyo yn Llundain ym mis Hydref i dderbyn y wobwr uchel ei bri hon.

Nod y wobwr oedd cydnabod cynllun *Employment Tribunal Litigant in Person Support*, a gafodd ei sefydlu gan Bwyllgor Pro Bono Cymdeithas y Cyfreithwyr Cyflogaeth.

Mae'r cynllun hwn yn cynrychioli partïon sydd heb gynrychiolaeth yn y Tribiwnlys Cyflogaeth. Mae'n cael ei gynnal bob wythnos yn Nhribiwnlys Cyflogaeth Llundain Ganolog a thrydydd Dydd Gwener y mis yn Nhribiwnlys Cyflogaeth Caerdydd.

Pan ddechreuodd yn y swydd fel Cynrychiolydd Cymru ym Mai 2016, un o brosiectau cyntaf Daniela oedd ymestyn y cynllun i Gymru. Cyfarfu Daniela â barnwyr lleol i drafod sut y gellir rhoi'r cynllun ar waith. Hyrwyddodd Daniela y cynllun ymhlith aelodau o Gymdeithas y Cyfreithwyr Cyflogaeth yng Nghymru (cyfreithwyr, bargyfreithwyr a barnwyr sy'n arbenigo mewn Cyfraith Cyflogaeth), er mwyn annog gwirfoddolwyr i lenwi'r rota.

Cafodd y cynllun ei lansio yng Nghaerdydd ym mis Hydref 2016, ac mae Daniela yn gobeithio cynnal y cynllun ddwywaith y mis o 2018 ymlaen.

Cafodd y cynllun ei enwebu am Wobr Cymdeithas y Gyfraith gan y barnwr cyflogaeth Sian Davies o ranbarth Cymru, a chafodd yr enwebiad ei gefnogi gan Arlywydd Tribiwnlysoedd Cyflogaeth Cymru a Lloegr, y Barnwr Brian Doyle. Dywedodd Brian:

"Roeddwn i'n falch iawn o weld bod y cynllun wedi derbyn gwobr "Highly Commended" yn yr "Excellence Awards".

Mae'r prosiect hwn wedi dod yn bell iawn mewn cyfnod cymharol fyr ac roeddwn i'n falch iawn o fod ymhlith y rhai a gefnogodd yr enwebiad. Alla i ddim pwysleisio ddigon faint o wahaniaeth y mae'r cynllun yn ei wneud i'n gallu i gynnig system gyfiawnder hygyrch yn y Tribiwnlysoedd Cyflogaeth".

Dyweddodd Daniela:

"Mae'n ffrainc cael bod yn rhan o'r prosiect hwn, sydd eisoes wedi helpu cannoedd o bobl i ddefnyddio'r system tribiwnlysoedd.

Rydw i wrth fy modd bod y prosiect wedi ei gydnabod gan Gymdeithas y Gyfraith ac rydw i'n gobeithio y bydd modd cynnal y cynllun ddwywaith y mis. Mae gwirfoddoli yn brofiad gwerthfawr iawn ac mae'n fy helpu yn fy ngwaith bob dydd wrth gynghori sefydliadau yn y GIG am faterion yn ymwneud â chyfraith cyflogaeth."



Uwch Gyfreithiwr Daniela Mahapatra (yr ail ar y chwith), gyda'i chydweithwyr o Gymdeithas y Cyfreithwyr Cyflogaeth yn y seremoni wobrwyo.

Ambiwlans Awyr Cymru yn ymweld â Thŷ Matrix



O'r chwith: Alison Davies - Rheolwr Recriwtio Rhanbarthol, Steffan Anderson-Thomas, Gwasanaeth Ambiwlans Cymru a Jacqui Maunder - Pennaeth Gwasanaethau Corfforaethol

Ar 19 Hydref, ymwelodd Steffan Anderson-Thomas, sef Cydlynnydd Cymunedol Gwasanaeth Ambiwlans Awyr Cymru, â'n swyddfa yn Nhŷ Matrix yn Abertawe.

Rhoddodd Steffan gyflwyniad am hanes Gwasanaeth Ambiwlans Awyr Cymru, am sut y dechreuodd, ble y mae ar hyn o bryd a beth i'w ddisgwyl yn y dyfodol. Soniodd Steffan am bwysigrwydd rhoddion i Wasanaeth Ambiwlans Cymru hefyd gan ei fod yn elusen.

Cafodd y cyflwyniad groeso mawr gan staff y Bartneriaeth Cydwasaethau, a ddringodd fynydd Pen y Fan ym Mannau Brycheiniog yn ddiweddar i godi arian ar gyfer y gwasanaeth.

Dywedodd Alison Davies, y Rheolwr Recriwtio Rhanbarthol

"Roedd cyflwyniad Steffan yn wych. Roedd yn ddiddorol a chraff iawn ac yn gyflwyniad manwl i sut mae'r gwasanaeth yn gweithio. Aeth i'r afael â'i hanes hefyd ynghyd â thrafod sut y gallwn ni gydweithio â'r gwasanaeth yn y dyfodol o ran nawdd a dulliau eraill o godi arian".




Steffan Anderson-Thomas yn cyflwyno i fynychwyr



Ystadegau Allweddol o 2016

ELUSEN AMBIWLANS AWYR CYMRU
WALES AIR AMBULANCE CHARITY

2016



BUSIEST DAY
SAT SATURDAY

BUSIEST HOUR
16:00

MISSIONS
2,559

903 MEDICAL MISSIONS

including

392 CARDIAC ARRESTS

671 RTC MISSIONS

55% MISSIONS DUE TO TRAUMA

397 MISSIONS WERE PAEDIATRIC



TOTAL MISSIONS

25,421

Y Bartneriaeth Cydwasaethau yn cefnogi cynhadledd i reolwyr practisiau meddygon teulu



Stondin y Bartneriaeth. O'r chwith, Angharad Pitt o Wasanaethau Gofal Sylfaenol a Claire Harris o Wasanaethau Cyflogaeth.

Cafodd Cynhadledd Rheoli Practisiau Meddygon Teulu Flynyddol Caerdydd ei chynnal yn ddiweddar yn Stadiwm Pêl-droed Dinas Caerdydd ar 12 Hydref 2017.

Nod y gynhadledd, sy'n un o uchafbwyntiau'r flwyddyn, yw rhannu'r wybodaeth ddiweddaraf â Meddygon Teulu a Rheolwyr Practisiau Meddygon Teulu am ddulliau ymarfer ac am brosiectau, rhaglenni a thueddiadau cyfredol ynghyd â chyfleoedd i arwain.

Roedd y siaradwyr yn y digwyddiad eleni yn cynnwys y canlynol:

- Vaughan Gething, Ysgrifennydd y Cabinet dros Iechyd a Gwasanaethau Cymdeithasol.
- Andrew Evans - y Prif Swyddog Fferyllol, Llywodraeth Cymru
- Martin Dickson - Pennaeth Gofal Sylfaenol, Gwasanaeth Gwybodeg GIG Cymru.
- Andrew Evans - Dirprwy Gyfarwyddwr Gofal Sylfaenol a Gofal yn y Gymuned a Gwasanaethau Iechyd Meddwl, Bwrdd Iechyd Addysgu Powys.

Roedd cydweithwyr o uwch dîm rheoli'r Bartneriaeth yn bresennol hefyd, ynghyd ag aelodau eraill o staff. Cynhalion nhw arddangosfa â sawl thema, oedd yn cynnwys cynrychiolwyr o Wasanaethau Cyflogaeth, Gwasanaethau Gofal Sylfaenol, Gwasanaethau'r Gweithlu a Datblygu Sefydliadol a Dysgu Digidol Cymru.

Hyrwyddodd y stondin nifer o wasanaethau a mentrau pwysig, gan gynnwys ymgyrch 'Hyfforddi, Gweithio, Byw', sydd â'r nod o annog mwy o feddygon teulu i ddod i Gymru.

Hyrwyddodd Gwasanaethau Gofal Sylfaenol nifer o'u gwasanaethau hefyd, trwy ddosbarthu bag oedd yn cynnwys gwybodaeth am Wasanaeth Storio a Chyrchu Cofnodion Meddygol Cleifion, y Cytundeb Lefel Gwasanaeth presennol â Byrddau Iechyd, y Tîm Rheoli Contractau a'r Adran Cofrestru Cleifion.

Trafododd a hyrwyddodd cydweithwyr o Ddysgu Digidol Cymru, Donna Harris a Julie Rogers, eu pecynnau dysgu ar lein, a helpon nhw staff o bractisiau meddygon teulu i ddefnyddio'r systemau hyn mewn sesiynau un wrth un.

Dysgu Digidol Cymru
Dywedodd y rheolwr, Julie Rogers:

"Roedd y gynhadledd yn brofiad gwerthfawr, oherwydd roedd modd inni hyrwyddo ein gwasanaethau presennol, a'r gwasanaethau hynny y byddwn ni o bosibl yn eu cynnig yn y dyfodol, ymysg ein rhanddeiliaid mewn practisiau Meddygon Teulu. Roedd y stondin yn brysur iawn trwy'r dydd ac roedd pob ymwelydd wedi canmol y cymorth a'r gwasanaethau yr ydym ni'n eu cynnig i'r sector gofal sylfaenol ar hyn o bryd."



Vaughan Gething - Ysgrifennydd y Cabinet dros Iechyd a Gwasanaethau Cymdeithasol



Y Bartneriaeth Cydwasaethau yn cefnogi cynllun cenedlaethol arloesol i recriwtio fferyllwyr

Cefnogodd Gwasanaethau Gweithlu, Addysg a Datblygu'r Bartneriaeth Cydwasaethau y Cynllun Cenedlaethol cyntaf i Recriwtio Fferyllwyr Cyn Cofrestru ar gyfer Cymru a Lloegr.

Mae'r cynllun recriwtio yn cynnwys proses drwyadl o ddethol fferyllwyr dan hyfforddiant mewn un diwrnod mewn lleoliad o'u dewis. Roedd un o'r saith canolfan cyfweld yn Stadiwm Dinas Caerdydd, a chafodd y cyfweiliadau eu cynnal dros ddau ddiwrnod.

Gweledigaeth

Y weledigaeth oedd datblygu system recriwtio yn seiliedig ar dystiolaeth a fyddai'n hwyluso'r broses o ddewis yr ymgeiswyr gorau am swyddi hyfforddi mewn modd teg, tryloyw ac effeithlon.

Cefndir

Mae gan GIG Cymru enw da am hyfforddi fferyllwyr cyn cofrestru, ac mae cystadleuaeth frwd am swyddi. Gall hyn olygu bod llai o amser yn cael ei dreulio â chleifion, gan fod angen llunio rhestrau byr a chynnal cyfweiliadau.

Mae'r broses newydd yn trefnu slotiau cyfweld i ymgeiswyr cymwys, gan ddileu'r angen i lunio rhestr fer. Mae'r broses symlach hon yn atal gwaith rhag cael ei ddatblygu ac mae'n decach. Croesawodd staff y Bartneriaeth y myfyrwyr i'r digwyddiad, gan wirio pwy oedd y myfyrwyr a chynorthwyo â'r gwaith o'u hasesu.

Eleni, penderfynwyd peidio â chynnal cyfweiliadau panel unigol mewn Byrddau Iechyd. Yn lle hynny, sefydlwyd chwe gorsaf safonol lle cynhaliwyd 'sawl cyfweiliad byr', asesiad â dewisiadau lluosog a phrawf cyfrifiadau.

Ar ddiwedd y diwrnod asesu, caiff pob un o'r 2,200 o fyfyrwyr sgôr cyn cael eu gosod mewn cynghrair genedlaethol yn seiliedig ar eu perfformiad.

Dyma'r tro cyntaf i weithwyr gofal iechyd proffesiynol yng Nghymru ddefnyddio dulliau sgorio electronig mewn cyfweiliadau yn seiliedig ar werthoedd, a daeth aelodau o Ddeoniaeth Cymru i arsylwi ar ein cydweithiwr, Nathan Williams, yn rhoi'r dechnoleg newydd ar waith.

Y Camau Nesaf

Caiff cynigion eu hanfon at fyfyrwyr rhwng 7 Tachwedd a 15 Rhagfyr 2017, a chaiff cyflogwyr fanylion am y fferyllwyr dan hyfforddiant a gaiff ei anfon atynt erbyn Ionawr 2018.

Cafodd cynigion eu cynhyrchu yn ôl safle'r ymgeisydd yn y gynghrair a'u dewis o leoliad. Mae myfyrwyr sydd â safle uwch yn y gynghrair yn fwy tebygol o gael cynnig lle yn eu dewis cyntaf o leoliad.

Mae dystiolaeth gynnar y gall Cynllun Recriwtio Cenedlaethol canolog leihau faint o amser y mae angen fferyllwyr fod i ffwrdd o'u gwaith arferol (treuliwyd 11.6 diwrnod yn llai wrth lunio rhestr fer yn y flwyddyn gyntaf).

Bydd Gwasanaethau'r Gweithlu, Addysg a Datblygu nawr yn adolygu llwyddiant y Cynllun Recriwtio Cenedlaethol o ran llenwi swyddi fferyllwyr cyn cofrestru gwag yng Nghymru.

Dywedodd Arweinydd Recriwtio Fferyllol Cymru, Michele Sehwat:

"Rydym ni'n hapus iawn gyda llwyddiant y ganolfan gyfweld ddeuddydd a gynhaliwyd i fyfyrwyr a chyflogwyr. Diolch yn fawr iawn i bawb a gydweithiodd â ni.

Mewn gwirionedd, dyma'r cam cyntaf mewn proses a fydd yn peri newidiadau sylweddol i hyfforddiant fferyllwyr cyn cofrestru yng Nghymru. Mae gennym ni nodau eraill mewn golwg hefyd, sef llenwi swyddi hyfforddiant yng Nghymru gyda fferyllwyr dan hyfforddiant da ynghyd â darparu hyfforddiant cyn cofrestru rhagorol, fel bod modd inni dyfu gweithlu sy'n darparu'r gwasanaethau gorau posibl yng Nghymru y mae'r unigolyn yn ganolbwynt iddynt.

Barbara yn 'camu i'r adwy' ym mis Hydref

Mae cydweithiwr o Wasanaethau Caffael yn Nhŷ Alder, Barbara Dolan, wedi bod yn brysur â sawl her i achosion da.

Mae Barbara wedi derbyn her '350,00 o gamau' ar gyfer elusen ganser Macmillan, Ward Plant Ysbyty Glan Clwyd a thaith Her y Byd ei nai i Malaysia.

Caiff yr arian a godir ei hollti rhwng y tri, gyda Barbara yn ymwrthod ag alcohol trwy gydol mis Hydref ar gyfer MacMillan. Bydd ei hymdrechion ar gyfer Ward Plant Ysbyty Glan Clwyd yn parhau tan y Nadolig, a bydd cydweithwyr eraill o Wasanaethau Caffael yn codi arian ar gyfer teganau ac eitemau eraill i blant.

Bydd Her y Byd yn helpu i godi cytiau i blant mewn llwythau ym Malaysia. Os hoffech chi noddi Barbara a helpu i godi ymwybyddiaeth, cysylltwch â:

barbara.dolan@wales.nhs.uk

*Y Newyddion
Diweddaraf am
Elusennau
Ein Staff*



Ysbyty Glan Clwyd, Y Rhyll

Tim yn cwblhau taith ar ei feic ar gyfer Elusen Dewi Sant

Aeth Tim Knifton, o Wasanaethau Cyllid a Chorfforaethol, ar daith feicio 50 milltir ar 16 Medi o Aberhonddu i Gaerdydd i godi arian ar gyfer elusen Hosbis Dewi Sant.

Cododd Tim dros **£220** ar gyfer yr elusen. Ar ddiwedd y daith, dywedodd Tim:

*"Roedd yr awyr yn glir ar y daith a doedd hi ddim yn rhy dwym. Aeth popeth rhagddo'n dda ar wahân i un olwyn fflat yn agos at ddiwedd y daith **53.5 o filltiroedd!**"*



St David's
Hospice Care
Bringing care home

FINISH
www.stdavidshospicecare.org

Find us on: @SDFHC St-Davids-Foundation-Hospice-Care

Registered Charity number: 10105

Staff y Bartneriaeth Cydwasaethau yn codi miloedd o bunnoedd i Elusen Ganser Macmillan

*Bore Coffi Mwyaf y Byd
yw digwyddiad codi
arian mwyaf Macmillan
ar gyfer pobl sy'n
dioddef o ganser.*



I helpu i godi ymwybyddiaeth ac arian i Macmillan, trefnodd staff ledled y Bartneriaeth Cydwasaethau sawl bore coffi yn ystod Medi 2017.

Cafodd y bore coffi cyntaf erioed ei gynnal ymhell yn ôl ym 1990. Roedd yn ddigwyddiad eitha' bach ac yn seiliedig ar un syniad syml: byddai gwsteion yn cwrdd dros goffi ac yn rhoi cost eu paned i Macmillan wrth wneud. Roedd mor effeithiol fel y cafodd ei gynnal eto y flwyddyn wedyn - ond ledled y wlad y tro hwn. Ers hynny, mae'r Bore Coffi wedi codi dros **£165.5 miliwn** i'r elusen.

Cododd cydweithwyr o Wasanaethau Caffael yn Ysbyty Athrofaol Cymru dros £200, a chododd tîm Cyflogres a Phensiynau Hywel Dda yn Hafn Derwen yng Nghaerfyrddin swm anhygoel o **£1,110!**

Cododd cydweithwyr yn ein swyddfa yn Nhŷ Alder yn y Gogledd dros £70 ar gyfer Macmillan. Trefnwyd bore coffi gan gydweithwyr o Wasanaethau Cyflogaeth, Melissa Duffy ac Eilir Griffiths, a chodwyd **£70**.

Cododd staff o Wasanaethau Cyfreithiol a Risg yng Nghaerdydd **£135**, a chynhalion nhw 'Bake-Off' ar yr un pryd. Rozalyn Hughes, a wnaeth *brownies* feganaidd, a Hannah Salerno, a wnaeth *millionaires shortbread*, oedd y cyd-enillwyr.



Cynhaliodd Gwasanaethau Cyfreithiol a Risg 'Bake'off' hefyd a gododd arian i elusen Macmillan.



Tîm Cyflogres a Phensiynau Hywel Dda. Cododd y tîm swm gwych o **£1,100!**



Eilir Griffiths o dîm Gwasanaethau Cyflogaeth y Gogledd gyda'r cacennau a helpodd i godi arian i Macmillan.



Cydweithwyr o Wasanaethau Caffael yn Ysbyty Athrofaol Cymru yn dangos yr eitemau a gododd dros **£200**



**WE ARE
MACMILLAN.**
CANCER SUPPORT

Dathlu Diwrnod Iechyd Meddwl y Byd

Ym mis Hydref 2017 dathlwyd Diwrnod Iechyd Meddwl y Byd. Cynhelir Diwrnod Iechyd Meddwl y Byd, dan arweiniad Ffederasiwn Byd-eang Iechyd Meddwl, ar 10 Hydref bob blwyddyn.

Yn ôl y Ffederasiwn, mae un ymhob pedwar oedolyn ac un ymhob deg plentyn yn debygol o ddioddef problem iechyd meddwl mewn unrhyw flwyddyn.

Gall hyn effeithio'n sylweddol ar fywydau degau o filiynau o bobl yn y DU, a gall effeithio ar eu gallu i gadw perthnasau, gweithio neu fyw o ddydd i ddydd hyd yn oed.

I helpu i nodi'r achlysur, mae staff y Bartneriaeth Cydwasaethau wedi helpu i godi ymwybyddiaeth o'r hyn y gellir ei wneud i sicrhau bod pobl sydd â phroblemau iechyd meddwl yn byw ag urddas.

Cafodd gwybodaeth ei rhannu ledled y Bartneriaeth Cydwasaethau ac ar ein cyfrifon cyfryngau cymdeithasol. Cynhaliodd staff yn ein swyddfa yn Nhŷ Matrix ddiwrnod o ymwybyddiaeth, a chafodd taflenni a phosteri eu dosbarthu ledled yr adeilad. Cafodd raffl a chwis eu cynnal a chafodd cacennau eu gwerthu, gan godi **£170**.

Dywedodd cydweithwyr o'r adran Recriwtio, sef Lisa Westermarck a Kerry Flower-Fitzpatrick, a helpodd i drefnu'r diwrnod:

"Diolch yn fawr iawn i bawb a gyfrannodd at ein standin cacennau a'r raffl ar gyfer Diwrnod Iechyd Meddwl y Byd. Codon ni swm sylweddol o arian. Byddwn ni'n rhoi'r holl arian a godwyd i'r Sefydliad Iechyd Meddwl".

Rhagor o wybodaeth. Yn ôl amcangyfrifon, dim ond chwarter o'r bobl hynny sydd â phroblem iechyd meddwl yn y DU sy'n derbyn triniaeth barhaus. Gellir dod o hyd i gyngor a chymorth yma:

www.mentalhealth.org.uk/

www.mind.org.uk/about-us/mind-cymru/



WORLD
MENTAL
heALTH
DAY

MEWN PARTNERIAETH

Ychwanegu Gwerth drwy Bartneriaeth



Gaeaf 2017

Os oes gennych chi unrhyw eitemau newyddion ar gyfer 'Mewn Partneriaeth', cysylltwch â

Nathan Williams, Swyddog e-Gyfathrebu

Email: nathan.williams@wales.nhs.uk

Ffôn: 01443 848537

Dyluniwyd a Chynhyrchwyd
gan Dîm Dylunio Graffig Partneriaeth
Cydwasaethau Cymru



GIG
CYMRU
NHS
WALES

Partneriaeth
Cydwasaethau
Shared Services
Partnership